



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Amarinder Singh-i Punjab Chief Minister menden toktsüogo

Rajya Sabha by-election atema BJP-i Sonowal shim



VOL. XVIII NO. 337 (ADOK 337) DIMAPUR

AMUNGNÜ (SUNDAY)

RONGJUI (SEPTEMBER) 19, 2021

₹ 5.00

## Interlocutor AK Mishra-i tanü NSCN (IM) den ajuruteptsü

**Dimapur, September 18, 2021** (TYO): Deobarnü NSCN (IM) den senden amentsü atema taoba Intelligence Bureau special director aser Naga yimjung olemtep atema Interlocutor AK Mishra tanü Dimapur tonga aruogo.

Naga yimjung olemtep atema Interlocutor tasen shimba Mishra-i asüing Chumukedima Police Complex nung NSCN(IM) den senden amentsü sentong lir. Osang angazükba agi NSCN-

IM general secretary Thuingaleng Muivah-ia Camp Hebron toktsür Dimapur tongogo.

RN Ravi aser NSCN (IM) tsüingda mangatetep adokba sülen Prime Minister's Office (PMO)-i yaküm Mishra den IB director Arvind Kumar nati NSCN (IM) den jembishini asütsü mapa nunglokja liasü. Ajisüaka, Interlocutor ka ama Mishra-i tang mezüing atema NSCN (IM) den ajuruteptsü.

## Nagaland CS J Alam-i CISHR semdang

**Dimapur, September 18, 2021** (TYO): Nagaland Chief Secretary, Jane Alam-i Honibarnü Dimapur nung Christian Institute of Health Sciences and Research (CIHSR) nung yipden 200 mozü ki yangluba semdangogo.

Covid wara tanabuba agi kangshiba amapang State war room nung iba mapatong inyaksü lemtet, ta tanü Chief Secretary-i ashi.

"June 2021 nungi iba mapa tenzüka inyak aser mapang tatsüka tsüingda mapa kanga junga inyakba ngua temolung asür. Iba mapa inyaker nem tenüingsang agütsü aser taküm October ita tetenzüklen lapoktsü

imlar" ta paisa metetdaksü. Nagaland CS Alam-i tang mezüing atema CIHSR semdang aser idakji resources aser facilities ngua tenük asüingba metetdaksü.

"Dr Sedevi-i anir bendanga agüja inyakba teloki CIHSR kanga junga ketdangsuba ajanga iba mozü ki ya tanga yimitem den kasa medemdangtsü akok" ta J Alam-isa ashi.

Iba mapang Health Secretary, Principal Director, Health & Family Welfare, Chief Engineer Housing, NSDMA Johnny Rongmei, IAS Sanjay Jaiswal, project in charge DC., CMO Dimapur aser Glocal company ketdangsurtem liasü.

## National Teacher Award angur Swedesunuo nem tenüingsang agütsü

**Dimapur, September 18, 2021** (TYO): Honibarnü National Teacher Awardee 2021 Head Teacher GMS Jakhama Swedesunuo Zao nem tenüingsang agütsüba sentong ka ayonga agiogo.

Iba sentong ya Directorate of School Education Morung Conference Hall nung agi aser

MLA & School Education Advisor K.T. Sukhalu IAS (Rtd)-i tetushi süa jaoker ka ama aden.

"Iba sempet ya shitakba agibo India President-i agütsür saka Covid wara ajanga Delhi-i moutetba agi School Education Advisor ket nungi dang Swedesunuo Zao-i sempet agizüktsü" ta Principal Director School Education Shanavas-i sentong tenzüka jembidang ashi.

Advisor K.T. Sukhalu-i Swedesunuo nem tenüingsang agüja jembidang "tesayur Swedesunuo-i Nagaland kübok district ajak semdanga kaketshirtem aser tesayurtem den ajurutepa sensaksemtsü atema department-i sentong atongtsü" ta ashi.

"Nagaland nung tesayur talila shimoka lir saka kaketshir

enrollment-bo tajemba akümer. Anungji asenoki sorkar school tem tajunga ta tsüraburtem aser kaketshirtem dang ashitsü nüngdaker" ta Sukhalu-isa metetdaksü.

India nung tesayur lakh aika rongnung national awardees shimteter aser iba ya taküm nung sempet tulutiba rongnung ka lir. Shisaliok wadang tajungba akümtsü atema nübortemi yariteptsü ayongzükter, ta paisa ashi.

Advisor Sukhalu-isa Swedesunuo Zao nem National Teacher award 2021 agütsü.

Department-i iba sentong ayongzükba agiba atema pelar ta Swedesunuo-ia ashi.

Lai national award angutsüsa nungita yariba atema staff ajak dang pelar aser tarutsü anogotem nunga lai bendanga agütsüshir aser tali tenendakba nung inyaksü ta laisa metetdaksü.

Sentong nung Special Secretary, Department of School Education & SCERT Kevileno Angami-ia o tatsüka jembia aser School Education Director Wonthungo Tsopoe-i sentong tembanga jembia.

## Nagaland United Government (NUG) nungi United Democratic Alliance (UDA) melener

**Kohima, September 18, 2021** (TYO): Nagaland Legislative Assembly nung political party temi Nagaland United Government (NUG) nungi United Democratic Alliance (UDA) ta tenüing melenogo.

"Honibarnü State Banquet Hall nung Nationalist Democratic Progressive Party (NDPP), Bharatiya Janata Party (BJP), Naga People's Front (NPF) aser Independent MLA tem senden ka amendang teletetba agi" ta government spokesperson Neiba Kronu-i ashi.

Taoba mapang MLA ajaki Nagaland United Government (NUG) tenüing agizüka liasü saka tanü senden nung Nagaland United Government (NUG) ajatsü molunga agizük, ta Minister Kronu-i metetdaksü.

August 11 aser 13 anogotem political party temi NUG ta ser külemi "Naga Political Issue (NPI) timi lemtettsü atema MLA tem longjemtsüla" bangzüngtepa aliba nungi masetshitsü atema tanü lemtetogo, ta paisa ashi.

Honibarnü senden nung parnokisa taoba mapang onük 5 lemteta aliba ama inyaksü aser Naga yimjung olemtep nung

tangatetba tajung agi yariteptsü teletetba agi.

Honibarnü bangzüngtepa nung Chief Minister Neiphu Rio, Deputy Chief Minister Y Patton, Leader of NPF Legislature Party T R Zeliang, NDPP president Chingwang Konyak, BJP Nagaland president Temjen Imna Along, NPF secretary general Achumbemo Kikon aser Independent MLA Tongpang Ozukum nungeri sign asü.

Züingsem 60 agi akümba Nagaland Legislative Assembly nung tang MLA 59 lir. NDPP MLA ka asüba ajanga menden ka tazüing lir. Iba nung NDPP MLA 20, BJP - 12, NPF - 25 aser Independent - 2 lir.

Chief Minister Rio-i Assembly Speaker dang sorkar nungja melenba osang sangoktsütsü aser ibaji Nagaland Governor dangia abentsü ta Minister Kronu-isa ashi.

### CM RIO-I CABINET REPRANGSHITSÜ NUNGLOKTSÜ:

UDA sorkar nung cabinet menden lemshitsü asü koda ta osangbeneri asüingdangdang "MLA temi iba mapaji Chief Minister ket nung yutsütsü lemtetogo" ta pai langzü.

Ajisüaka, opposition maliba sorkar akümtsü atema shisatsü agütsür NPF-ibo parnok sorkar nung tashi atema masü saka Naga yimten latettsü atema tangatetba nung dang sorkar nung adener ta ashir.

### ASSAM CM SARMA-I NAGALAND SEMDANGTSÜ:

Assam Chief Minister aser North East Democratic Alliance (NEDA) convenor Himanta Biswa Sarma-i September 21 nü Dimapur nung arua Naga olemtepertem aser Naga peace talks atema Interlocutor tasen A K Mishra nunger den ajuruteptsü, ta Kronu-isa ashi.

"Centre-i nungloktsüba ama CM Sarma-i Nagaland semdangtsü aser idangji state sorkari tentetba Core Committee of NPI-ia Sarma aser Mishra na den ajuruteptsü" ta paisa shisem.

Mishra-i Naga yimten tebilemtsü kanga junga meteta lir anungji sorkari pa dak nungi tajungtiba imlar, ta paisa ashi.

Core Committee on NPI-i NSCN (K) Niki Sumi telok den ajuruteptsü sentong ali mali ta osangbeneri asüingdangdang "tang atemabo iba teletetba magi lir" ta Minister Kronu-i langzü.

## COVID-19 Nagaland: 60 dak putet, 37 taneptsü angu & 1 asü

**Kohima, September 18, 2021** (TYO): Honibarnü Nagaland nung nisung 60 dak COVID-19 aliba putet aser parnok züingsema nisung ajak agi 30,840 kümogo.

Anogo 9 tashi COVID-19 puteter dang nungibo taneptsü angur teimba süa arur tanü puteter teimba liasü.

"Tesüiba ghonda 24 tsüingda nisung 60 dak COVID-19 aliba putet. Parnokji Tuensang nung 21, Dimapur nung 20, Kohima nung 12, Phek nung 5 aser Mokokchung o Peren nung kaka (1) lir" ta Integrated Disease Surveillance Project atema State Nodal Officer, Dr Nyanthung

Kikon-i ashi.

"Kasa mapang COVID-19 puteta alir nisung 37 taneptsü angu. Parnokji Dimapur nung 14, Mokokchung nung 10, Tuensang nung 6, Kohima nung 5 aser Phek nung 2 lir" ta paisa ashi.

Nisung 30,840 nungi 28,752 taneptsü nguogo aser ibaji 93.22 % lir. Tang nisung 491 anepaludar, ta Dr Kikon-isa metetdaksü.

Tanü Dimapur nung COVID-19 puteta alir ka asüba züingsema tasür ajak agi 653 kümogo.

"Hokolbar tashi nung nisung 676,520 nem COVID-19 vaccine

indang dose 967,998 agütsüogo" ta State Immunization Officer, Dr Ritu Thurr-ia metetdaksü.

Vaccine agirtemji frontline workers 60,913, healthcare workers 15,993, arishi küm 45 ser temapur 196,119 aser arishi küm 18 nungi 44 tsüingda alir 403,495 lir, ta paisa ashi.

"Vaccine agirtem rongnungi nisung 291,478-i dose anaprong agiogo. Parnokji frontline workers 46,771, healthcare workers 13,169, arishi küm 45 ser temapur 126,243 aser arishi küm 18 nungi 44 tsüingda alir 105,295 lir" ta Dr Thurr-isa metetdaksü.

## Union Minister Chandrashekar-i Dimapur nung Mongken semdang

**Dimapur, September 18, 2021** (TYO): Union Minister of State for Skill Development & Entrepreneurship, Electronics & Information Technology, Rajeev Chandrashekar-i Honibarnü Dimapur nung Mongken semdangogo.

Mongken ya apparel & garment production aser training unit ka lir aser SANKALP, Ministry of Skill Development and Entrepreneurship, Government of India kübok

mapatong ka lir.

Iba mapang Additional Director DUDA, Anungla Phom-i Union Minister Chandrashekar dang Department of Underdeveloped Areas (DUDA)-i Mongken brand mapa tenzüka indang osang metetdaksü.

Nagaland nung local designers, artisans aser craftsmen nem rongsenkettsüing tsütsü lenmang lapoktsütsü atema iba mapatong tenzüka ta

laisa ashi.

2019 küm Eastern Nagaland indang district headquarters ajak nung Anghya market linkage hub tenzüka ajanga yimtsüing nung alirtemi sen angutsü lenmang lapoktsü ta Anungla Phom-isa metetdaksü.

Iba mapang Union Minister Chandrashekar-ia Skill & Technology ajanga yaria traditional crafts yokdoktsüba nung akokba tashi yaritsü ta nangzük.

## BJP Nagaland-i PM Modi sor küm 71 ka ajungba benjung mungogo



BJP Head office Kohima nung Union MoS Chandrasekhar aser BJP Nagaland lenirtemi PM Modi indang birthday cake arangba noksa nung angur.

**Kohima, Rongjui/September 18 (TYO):** September 18 nü linük ajunga nung Ato Kilonser Narendra Modi sor küm 71 ka ajungba benjung amungba mapang Nagaland BJP-ia Kohima jila nung meremeju sentong ka ayongzüka agiogo. Iba sentong ya NDPP den longjemer agi aser party indang Head office nung Union Minister of State Rajeev Chandrasekhar matsüngdang cake arangba sentong agia liasü.

Chief Minister Neiphiu Rio aser Deputy Chief Minister Y Patton na den BJP tir aser Minister Temjen Imna Along-i anir Nationalist Democratic Progressive Party (NDPP) aser BJP party züngsemtem Old MLA Hostel junction nung ajurutep aser telok balala lemsar mapa inyaka liasü.

Merekmeju sentong metenzük tsüngda o tatsüka jembiba mapang Chief Minister Rio-i, PM Modi ya linük tejakleni anir aotsü atema kanga dang tedangshi aser nukla tulu akaba lenir ka lir, ta ashi. Paisa, People's Democratic Alliance (PDA) pur Ato Kilonser nem aküm tetushi agüja adenshi, ta ashi.

Modi teyari aser temaotsü nung pai state nung PDA sorkar anir ta shia Rio-i Naga nunger ajangzüksü atema maneni longjemer inyaksü imlaba lemsatep.

Kasa mapang nung Deputy CM Y Patton-i, Ato Kilonser ama Modi shimba ya linük atema kanga tia taka ta ashiba den, pa anema aser arishia alitsü imlaja ataba lemsatep.

Nikongtsütsü BJP Head office nung Ato Kilonser Modi indang birthday cake arangba sentong nung Union Minister of State for Skill Development & Entrepreneurship, Electronics and IT, Rajeev Chandrasekhar-a dena liasü.

Iba sentong nung o jembiba mapang Chandrasekhar-i, Ato Kilonser-i party nung inyakterem ajungmesoba dang masü saka lokti, yimtsüng, state aser linük tajungba kuma yanglutsü asoshi nukla yur aliba nung parnoka shilem ka ama bilemdaktsür. Modi-i tejakleni aotsü aser terenlok asoshi ajak nem kasa maangka agütsütsü atema tongtibangsa inyaker, ta Chandrasekhar-i ashi.

Paisa, Modi-i taoba küm tenet tsüngda nübertem aser sorkar tsüngda tesendaktep yanglushitsüogo aser kasa mapang nung sorkar aser lenirtem inyakyim melenshija nübertemi aginüba ama yimsüsüba, terenlok, shisaliok aser employment dak sendakba nung temelenshi bener arutsüogo, ta ashi.

Centre nung Modi-i aniba BJP sorkari linük terenlok jenjang

melenshitsuogo ta ashiba den India tasen kuma yanglushitsü atema PM Modi kübok BJP nukla lir aser political party kechaia BJP den metokteptetsü, ta ashi.

Union MoS-isa, party kübok inyakterem dang temulung mademtsü saka maneni meranga inyaksü ajungshi, kechiyong BJP ya alima nung yimden yimsüsüba lokti tentettem rongnung khenyongi tebandang maliba lokti ka lir aser party-i züngsemtem renloka aotsü atema maangka kasasa agütsür, ta ashi.

Maneni sentong nungsa, BJP national otongdar aser IT & NRE Advisor, Mmhonlumo Kikon-i, Ato Kilonser Modi tasoba anogo amungba ya party aser Nagaland asoshi kanga tongtibang anogo ka, shibai Nagaland densema state ajak terenlok asoshi rangloker inyaker, ta ashi.

Paisa, tir Temjen Imna Along lenisüba kübok BJP Nagaland unit-i kanga meranga inyakba atema tenüngsang agütsü, kechiyong iba ajanga state nung party maitsü melenshiogo aser nübertemi party agizüker, ta ashi.

Kikon-isa, BJP züngsemtem dang party yongtsü nung tilateri mangatetep aliba ajanga temulung mademtsü saka nübertem ajangzüksü atema maneni longjemer inyaksü ajungshi.

## MOLUNGNEN O



Asur Wapongtemjen Pongen (Chuchuyimlang) Asoba küm- 09-03-1985 ~ Tasüba küm- 13-09-2021

Asur Wapongtemjen Pongen mapang tatsüka shiranger 13-09-2021 aonung Kibubai jaar aoba mapang kinungertem ya asangsang asü pongmang ta mamangteti mangyima alidang shirnokisa rongsen, nübu aser sarasadem agi ozü mangyim jashi lemsatepogo, nenok ajak dang kangasa pelaba lemsateper.

Talisa item telok dang kanga pelaba metetdaksür :

1. Dew Drops
2. Blood donors
3. Aokong Colony Council, lanur aser kiyongertem.
4. Sharon High School Family (Classmates)
5. District Jail staff aser District Jail Ao staff telongjem, Dimapur
6. Dimapur Ao Baptist Arogo
7. Dimapur Ao Lanur Telongjem
8. Dimapur Langpangkong Senso Telongjem
9. Aoli Pongener Telongjem Dimapur Unit
10. Ambulance (Yongkongsashi Pongen)
11. Chuchuyimlang Alaba Asotsür Telongjem, Dimapur
12. Chuchuyimlang 5th buba Rionsganger Züngar, Dimapur
13. Chuchuyimlang Students' Union, Dimapur
14. Dimapur Area Chuchuyimlang Senso Telongjem

Tsüngremi nenok takum aser wadang moajang ta ozü sarasadem.

- Temeim tsürabur aser kinungertem.

## Security Forces-i yi ayoker ana apu



**Dimapur, Rongjui/September 18 (TYO):** September 14 nü Security Forces-i police den longjemer meita aoba mapang Dimapur kübok Signal Basti, kiyong nung ozüng alema yi yokyayokchir ana puogo.

Osang tejanga angazükba sülen Security Forces aser police na longjemer Signal Basti

nung tesem kar meita aoba mapang nisung ana ket nungi sen lakh 24.2 alang yi case 410 aser sen 80,000 nguteta liasü.

Ken o nung aija alisang ana aser tena ket nungi ngutetba yi aser sen Sub-Urban Police Station Dimapur nem ken o maneni bushisüngdangtsü atema bendanga agütsüogo.

## Pedal Tribe-i State Stadium, Dimapur merektsü



**Dimapur, Rongjui/September 18 (TYO):** September 18 nü Alima ajunga nung World Cleanup Day 2021 amungba anogo Pedal Tribe cycling team nungi züngsemtemi State Stadium, Dimapur nung plastic janatem merektetja liasü.

Pedal Tribe ya 2021 küm June ita tentet. Parnok ya

temang anema alitsü asoshi aser tzümpung raksaba temulungdang yur 'RIDE BICYCLE. SAVE ENVIRONMENT. STAY FIT' omen nung ajemdaker inyaksangshir.

Pedal Tribe-i, jana bendentsü atema DMC-i jana belenshiba pick up tractor ka agütsüba atema aser anepdang Stadium

nung asemzürtemi jana bendenba nung teyari agütsüba atema kanga pelaba lemsatepogo.

Parnokisa, Pedal Tribe-i tarutsü nunga asenok temeket mereka ayutsü aser tzi mopung wazüka ayutsü atema inyaksü ta ashiba den nübertem ajak dang pei aliba tesem temeket mereka ayutsü ayongzüka liasü.

## NBSE-i Webinar ka ayongzüker

**Dimapur, Rongjui/September 18 (TYO):** Nagaland Board of School Education-i sangdong ka ajanga, züngoksema aliba Institution tekolaktem dang September 21 nü nikongtsütsü 3:30 ako nungi tenzüka 'Experiential Learning' dak sendakba nung webinar ka agitsü ayongzüker metetdaksüogo. Iba sentong ya NEP 2020 nung tongtibang tinyaksü ka aser Orient Blackswan Private Limited den longjemer agitsü, ta kasa sangdong ajanga metetdaksü.

NEP 2020 kübok school education jenjang ajak nung experiential learning benoktsü lateta lir, kong subject ajak nung

pedagogy ama hands-on learning, arts- integrated aser sports-integrated education, storey-telling based pedagogy amala densema lir.

Anungji Institutions tekolaktemi tasa tasentem aser kaketshirtem teyongtsü sädaktsüba pedagogical inyakyimtem jangjaa alitsü kanga tongtibang kumogo, anungji institution tekola ajak dang iba webinar nung tamakok maludaktsüi jangrabangra arua adentsü tetuyuba agütsüogo. Iba senden atema district whatsapp group tem nung ID aser pass code lemsateptsü, ta kasa sangdong ajanga metetdaksü.

## Manipur nung Hathei mersü aser Tamenglong naring ajanga GI tag nguogo



Hathei mersü



Tamenglong naring

**Imphal, September 18, 2021 (Agencies):** Manipur nung kanga tsünüba Hathei mersü aser Tamenglong naring nem GI tag agütsüogo.

Iba osang ya Manipur chief minister Biren Singh-i metetdaksü.

"Iba ya otsüsüsü anogo ka lir. Manipur nung tsünüba Hathei mersü aser Tamenglong naring nem GI Tag agütsüogo.

Iba ya Manipur putiotsü nung tongtipang takok ka lir aser aluyimertem kanga ajangzüksü" ta Manipur CM Biren Singh-i metetdaksü.

Hathei mersü (umoruk) ya Tsüngremer sempet ta züngshir aser iba ya Ukhrul indang naroküm ka lir.

Hathei mersü ya Tangkhul Naga nung aliba Sirarakhong yim meketa aliba Mahadev hills

nung dang tsünür.

Külen, Tamenglong naring ya Tamenglong district nung dang angoba süngjang balaka lir.

Iba naring ya tanang aser 'acidic taste' lir aser süngjang shia telen 10-14 shi alir.

Manipur nung tesüiba küm 15 tashi Tamenglong naring ajungkettsü atema December ita shia Orange Festival mongyonga arur.

## Tripura DM temi field level officers atema security meshir

**Agartala, September 18, 2021 (Agencies):** Anogo asem tejakdang Tripura nung nisung telok kati Block Developmet Officer (BDO) ka amakba sülen district magistrate aikati superintendent of police dang BDO aser Deputy Collector and Magistrates (DCMs) nem security agütsütsü teyari meshiogo.

Poangbari Rural Development block nung Block

Development Officer (BDO) Vaijayanta Sarkar-i Pradhan Mantri Awas Yojana mapa inyakdang nisung 40-50 shi kati pa amak.

Iba ya police lia atalok aser sorkar ketdangsür karbo jena otet.

Unakoti District Magistrate UK Chakma aser Sepahijala District Magistrate Vishwasree B na dena district magistrate kari pei pei district police superintendent tem dang BDOs

asem DCMs nem security agütsütsü tetuyuba agütsü.

Iba lendong atalokba sülen Tripura Police-i nisung 5 puogo. Ajisiük, Tripura kübok tanga tesemtem nunga iba amai lendong ataloktsü tsübur.

Tripura nung IAS aser TCS Association teloktemi Vaijayanta Sarkar (TCS 2014 batch) amakba khukhua aitsüogo aser aibelenertem aputsü atema takhangba agütsüogo.

## Rajya Sabha by-election atema BJP-i Sonowal shim

**Guwahati, September 18, 2021 (Agencies):** October 4 nü Rajya Sabha by-election atema BJP-i Union minister aser taoba Assam chief minister Sarbananda Sonowal aser minister of state L Murugan na tenüng shimogo.

Sonowal ya Union minister for Ports, Shipping and

Waterways teinyakdak lir aser Assam nung Rajya Sabha menden tazüng atema BJP-i pa shim. Külen, Murugan ya Madhya Pradesh nung BJP indang candidate lir.

Tenaprongi Rajya Sabha by-election nung takok angutsüla. Assam nung BJP züngsem

Biswajit Daimary-i Rajya Sabha menden toktsüba ajanga tazüng aküm. Daimary ya tang Assembly Speaker lir.

West Bengal, Assam, Tamil Nadu aser Madhya Pradesh nung Rajya Sabha MP 5 tashi mapa nung anenba ajanga tazüng aküm.

## AMCH Principal Dr Kakoti temang mejungi Guwahati-i anir ao

**Dibrugarh, September 18, 2021 (Agencies):** Assam Medical College and Hospital (AMCH) Principal Dr Sanjib Kakoti temang kanga mejungi akümba agi Honibarnü pa tayimtsü ajanga Guwahati-i anir ogo.

Dibrugarh nung air ambulance ka nung pa Guwahati-i anir ao.

Tawa tu Dr Kakoti dak Covid19 aliba putet aser iba sülen AMCH indang Super Speciality Block nung anepalua aru.

"Dr Sanjib Kakoti temang tamajungba akümba agi onoki pa tayimtsü ajanga Guwahati-i anir ogo" ta AMCH superintendent Dr Prasanta Dihingia-i ashi.

"Pa AMCH nung air ambulance ka nung anir ao. Super Speciality Block nung doctor tejen telok kati pa anepalua aru" ta paisa metetdaksü.

Dr Sanjib ji All India Institute of Medical Sciences (AIIMS) New Delhi-i anir aotsü sentong liasü saka pa temang tamajungba akümba agi Guwahati-i ang anir ao.

Hokolbarnü State agriculture minister Atul Bora-ia AMCH, Dibrugarh semdanga Dr Kakoti indang osang metetpela liasü.

Hokolbarnü Dibrugarh nung sample 1,893 tendangba nung nisung 9 dak Covid19 aliba puteta liasü.

## Lovlina Borgohain indang 'boxing gloves' ajanga sen teimba angu

**Guwahati, September 18, 2021 (Agencies):** Tokyo Olympic nung bronze medal angur Lovlina Borgohain indang boxing gloves ajanga e-auction nung sen aika yokzüker.

Prime Minister Narendra Modi tasoba anogo tenüng nung Ministry of Culture, Government of India-i Prime Minister Narendra Modi nem agütsüba gifts & mementos e-Auction asür.

Assam tsür Lovlina indang boxing gloves indang base price ji Rs. 80 lakh liasü aser tanü tashi nung Rs 10 crore agi

alizüksü shiogo. La den külemi, Olympic gold medallist Neeraj Chopra indang javelin-a Rs 10 crore agi alizüksü shiogo.

Nisung kati Lovlina indang gloves Rs 10 crore agi alizüksü ashi. Tang tashi nung nisung 11-i la indang gloves alitsü shiogo.

Iba e-auction nung items 1,330 lir aser iba nung yokzüka senji "Namami Gange Mission" nung amshitsü.

Iba e-auction nungsa Olympic gold medalist Neeraj Chopra indang javelin atema Rs. 1.5 crore agütsütsü shiogo.

## Justice Biswanath Somadder-i Sikkim Chief Justice inyaktsü akok

**Gangtok, September 18, 2021 (Agencies):** Meghalaya High Court nung Chief Justice teinyakdak Justice Biswanath Somadder-i Sikkim High Court nung Chief Justice inyaktsü akok.

Sikkim High Court nung taoba Chief Justice Jitendra

Kumar Maheshwari Supreme Court nung judge inyaktsü ajungketba sülen menden tazüng aküm.

Hokolbarnü Supreme Court collegium-i state high court 8 nung chief justice tasentem shimogo.



Border Security Force (BSF) indang 110th Battalion-i Indo-Bangladesh arrtsü anasa yim ka mita aodang Hamidul Sarkar ta ser nisung ka apuba noksa nung angur. Pa ket nung Yaba süngjang 660 den Honda motorcycle ka apu. (Dhubri, September 18)

## NIA-i Manipur Rifles prangpong-injang yokdoker ka apu

**Imphal, September 18, 2021 (Agencies):** Kuki telungpur telok UKLF nung chairman-i sorkar prangpong-injang ozüng alema ayokba nung shilem agiba atema puogo.

United Kuki Liberation Front (UKLF) chairman, Lhunkhoson Haokip ya jenshia aru saka Brihostibarnü pa puogo, ta NIA-i metetdaksü.

2nd Manipur Rifles indang prangpong-injang miima yokshiba ken o dak sendakba nung pa apu.

Haokip den tangartemi sorkar indang prangpong-injangtemji

Kuki Revolutionary Army (KRA) aser UKLF teloktem dang ayok. Manipur nung ozüng alema mapa tuluba inyaktsü atema parnoki iba mapa inyok, ta NIA ketdangsür kati ashi.

Taoba mapang NIA ketdangsürtemi Haokip'er mita aodang 9mm pistols 9 tashi nguteta liasü.

"Pa apuba sülen Imphal nung special NIA court-i anir ao aser parnoki September 21 tashi NIA ket nung ayutsü temelaba agütsüogo. Onoki maneni iba ken o atema bushisingdang südar" ta NIA ketdangsürisa ashi.

### GOVERNMENT OF NAGALAND DIRECTORATE OF SCHOOL EDUCATION NAGALAND: KOHIMA ADVERTISEMENT

Dated Kohima, the, 17thSept.' 2021

NO.ED/EST-1/ADV/EXAM/2020-21:: In compliance to the Hon'ble High Court Order dated 23.08.2018 in W.P (C) No. 326 (K) of 2017 applications are invited from eligible candidates belonging to Chakhesang Community for 1 (one) post of Carpentry Instructor at Government High School, KhulazuBasa under the establishment of Sub-Divisional Education Officer, Chozuba in the Pay Matrix Level-6 with the following conditions

- Age should not be less than 21 years and not more than 35 years as on 30.09.2021. The upper age limit is relaxable by 5 years for the candidates who are in Govt. Service.
- Applications are to be submitted on plain paper with 2(Two) passport Photo and standard Bio-Data along with photo copy of Educational Qualification documents, Schedule Tribe, Indigenous Inhabitant and Birth Certificate.
- The Minimum requisite educational qualification will be Matriculate/Class-X passed or its equivalent with a certificate course of at least one year duration in the relevant from ITI run/ recognized by the Government of Nagaland.
- Application should be addressed to Principal Director, School Education Nagaland, Kohima with Rs 200(Rupees Two Hundred)/- only in cash or Demand Draft in favour of Directorate of School Education, Kohima as processing fee.
- The last date for submission of application along with documents shall be 07-10- 2021.
- Incomplete documents shall be summarily rejected.

Date and Time of the Written Exam will be communicated separately.

(SHANAVAS C) IAS  
PRINCIPAL DIRECTOR



## TIR YIMYIM YIMOBILEM (EDITORIAL)

DIMAPUR AMUNGNÜ, RONGJUI (SEPTEMBER) 19, 2021

### Ajemaalurtem

**A**lima tsütsü bilemdangbo ajemaalurtemji tebur saka lapi, anungji yimten aser lokti nung tagidak makaba purtem amai asenoki bilemer. Ajisüaka, Yisui bo ajemaalurtemiang alima senmang amangtsü ta Mathi 5:5 nung shia lir. Aji oda, Yisui bilemba o asenoki bilemba naji amsam itta lir. Asenokibo alima senmangji terakzür meyong ta bilemer saka Yisui ashir, alima senmangji tashiyim amshia aseni aginüba rakzüka amangba agi mamangtetsü. Aji oda, Yisu tsüngdang ajemaalurtemji alima tsütsü lapilarartemji masü mesüra tashimait aser tasümaitemtemjia masü. Yisui ashiba ajemalusingji arem shiti mesük, paji tashi kanga tait aser tasüa tait, pai kecha metsübur, ajisüaka kodang nisungtemi paji pua bener arua azüoker, nisung meyerijangia makoktsüba tashi aser tasü tait shiti to pa pua abener arua azüoksang kibur tsüngdang kanga ajemalua akümer. Iba shiti to kasa arem shiti, tesashi aser tetsübutü mit aketba shiruru, ajisüaka kiburi azüok nungji kiburi ashi anga ajemalua alir. Iba kasaji, ken mapang kabo asenoka nisung tesü, tamajung aser samaro, ajaki tsübu repringba nisung ser alitsüa akok, saka kodang Yisui asenok apu aser tanüla temeshi nem asenok azüokdaksü, asenok taküm to akhi memesük tesangwa, taremsük, kumli tajung aser tejungnü nisung akümer. Akhidang, kecha masü nung ain adoka tangar yiruja aliba nisung to tangbo tangar ain adokdang madoker, tangar jashidang mejashir, kümli tasü kümer Tsüngremi mulungba nung dang jajar, kechiyong Tsüngremji dang pa taküm nung kibur ta pai angateta lir aser iba kibursang tashi jagi pa azüoka lir. Aji oda, ajemaluba tetezü asenoki asen temeten bushia tangar den metokteper saka Tsüngrem nem dang toktsür. Ajemaluba tetezü tanüla temeshi nem dang asen taküm aser mapa ajak bendanga agütsür. Aji oda, ajemaluba tetezüji talangka aremsükba aser asen mulung masü saka kibur mulung südaksüba taküm yimya aser jakliro lir. Mosa kanga ajemaluba nisung liasü. Aji oda, Israel nung amang agi sangwa küma arem aser lisem lima ajanga anir aruba Mosa dangji asenoki lapi ajatsü asü. Mesüra, ain adoker ozüng longpak jaksaa endokba nisungji lapi asü? Nisung tsütsü paji teburchi aser samaro. Ajisüaka, Tsüngremi azüokba agi ajemalu nisung aküm. Aji oda, Yirusalem tenla ki menenja shishilembartem aser sen melenertem mena aliba menden meküplokja aina adoksang Yisu Khrista dangji asenoki lapi ta ajatsü asü? Pai pa arishir dang kecha mashi. Kangki nung angenloktsüba mapanga Pai kotak nungi kotak tenyar meyi aika jakzüker Yihuda nungertem to ajak pua yuteta liasü, saka Pai aremsük, kechiyong yamaji inyaksübaji tebuti memulung. Aji oda, Yisui ajemalua Yihuda nungertem nem kangki nung agenloktsüba ajanga Pa tashi tuluba nung shia aru. Iba jagi tanü asenoki Pa külemer. Pai alima aser kotak senmang amangtsüsa ajemalua pa taküm bendanga agütsü. Tanü asenok akümlirtem dang ajemalua lira, alima senmang amangtsü ta shia yutsüba Tsüngrem o ji tiyazü masü. Nai tendanga tangar dang aremsükdangang, o tamajung tejembi, mapa tamajung teinyak, Tsüngremi mulungba bushiang aser aji inyakang. Atangji, alima nung ali senmang ajakji angutsü. Mathi 5:5 nung nangzükba senmang yabo ali shi taküm ya süitemer amangtsüba kotak senmang indang ashiba masü, saka tang akümli nung amangtsüba ali rongsen indang ashir. Na teburchi aser samaro ta Tsüngremi meteta lir. Na tesangra, shisataka aser tasütait tetsür ta Tsüngremi meteta lir. Ajisüaka, Laishibai ashir, alima nung ali senmang amangtsüsa takar akümtsüba ya tasü aitba agi masü mesüra shisa akaba agia masü, saka ajemaluba agidang amangtsü. Tetezü, ajemaluba ya rongsen aruba lenmang aser iba lenmang nungi anguba rongsenjibo asen senmang asütsü. Ajisüaka, tekümdangtsü kaji samaro mapa inyakba agi mesüra asenok shisa akaba kija agi anguba rongsentemjibo asen senmang masütsü. Ibaji aseni ngua samatsü. Alima senmang amangnüra, Laishibai ashir, AJEMALUANG.

## OLEMSABANG

### Atepzüng aser Arrtsü atena oa Tenyaba mapa nung liromedem

- Onenlemla

Arrtsü atena oa inyakba missionji akok tashi inyaksü, saka iba den külemi human development aser social concerns/member care ya arogotemi khen temulung agütsü nung kanga ajungtsü. - Takatoba

Lai bushiba aser angatetdaksüba nung arogoi rongsen, nübu aser mapang endoktsüla. Tetezü Sunday sermon driven church dangbo masütsüla. - K. Temjen

Tsüngremer mission-ji 'local arogo kingdom', 'Aor arogo kingdom', 'Naga nung arogo kingdom' mentality nung masü saka "Kingdom of God" tangatetba nung inyaksüla. - Chuba Longkumer (Nepal)

Arogo tajabaji tenyaba mapa inyaksü asoshi jatet. Arogo tenyaba mapa meinyakra iba arogoji tasü lir. Yisu Khristai pa nütsüngtem dang, "Anungji nenoki oang aser kin ajak nütsüng kümdakjang, Tebu, Techir aser Tanela Temeshi tenüng nung parnok baptijang" Mathi 28: 19 ta nungloktsüba nungi bendang lima oa tenyaba mapa inyakba dangji dangbo majar. Iba nungi atepdang aser arrtsü atena oa tenyaba mapang ajak dena lir. Asen lima atepdang mission nungi tera temulung magütsür amai ta ajiteta 'Atepdang aser arrtsü atena or inyakba tenyaba mapa koba nung temulung tagütsüba? Koma atepdang tenyaba mapa tashi ita kümdaksüba ajanga arrtsü atena oa tenyaba tashi ita kümdaksütsü ta YSS nung sensaksemba nungi bilemdangtsü asoshi olong kar lemsateper.

#### Tenyaba indang Lai tesayuba

Bendang lima talang nung sama aliba tongtibangba asü, asen atep nung sama alibaji tongtibangba? - Zulu Jamir

Tenyaba mapa koba dang 'mission' ta ajar iba Tsüngremi nungi tenzük. Tsüngremi pei ajaso chir Yisu Khrista alimai yok, tetezü Tsüngrem ya "missionary God" ta ashitsü akok. Tsüngremi kija aser telok putu balala nung jateta Pai nungloktsüba ataloktsütsü yokba angur. Tsüngremi Israel kin alima dang ochi kulisür asütsü jatet. Tejen Lai putu Tsüngremi Mosa aser Aron, Obendanger, Aikartem aika ochi sangoktsütsü jatet. Yisu Khristai pa alimai aruba tenyaba mapa nukjidong yamai sangoktsü:

Kibuba Tanela kü dak lir, kechiaser sensaker dang osangtajung sayutsüngitsü pai ni mezüja shimtet.

Puoka alirtem dang techiokba sangoktsütsü,

nüpkokertem tenük lapoktsütsü,

Ajemrepba nisung nüji küma yoktsü.

Kibubai agizüksüba küm sangoktsütsü asoshi pai ni yok. (Lk 4:18-19)

Yisu Khristai sayuba tenyaba mapa nung tongtipang kaji, jendoka alir, ajemrepa alir, nüchi makai alir nem nüchi agütsüba tenyaba mapa ya tongtipangtiba lir. Khristai nungloktsüba ama Khristan teloki "mission" ta asübaji takari, takar arogoi tanga limai oa amangdakja, tzü nung tzüsenja aser arogo tentetja aoba den school, kaket-ken-o, hospital aser lokti nung ajemtepba tia nung alir nüchi asoshi inyak. Mission ya takari inyaksüba mapa amai dang bilem. Saka tanü atepdang tenyaba nung tashi maitra aser temulung magütsüra, arrtsü atena oa inyakba nungji temoatsü malitsü ta angateter. Sendoka alir dang nungi mission indang tangazüktsü aika lir ta angateter. Mission ya Tsüngrem meyong, temeshi mapa ka anungji iba tenyaba mapa nung ajaki ochi shia shilem agitsüla. Ochimashi rongsen ajanga tenyaba mapa inyakra temoatsü malitsü aser Tsüngrem mepelatsü, anungji amangba pur ajaki ochi nung shilem agitsüla. Tenyaba mapa tapu ana lemsatsü akok:

(1) Aepdang Tenyaba mapa (home mission) koba Naga lima telongtet nung Aor, Naga nung rongnung inyakba.

(2) "Arrtsü atena or inyakba Mission" koba Naga lima atena oa ana aser talang nung kin balala aser oshi balala den inyakba.

Item mission anaprongla nung lim arogo aser Mungdangi rongsen aser nübu agi ana aser talang nung inyaka arudagi. Lim arogo kari Naga lima telongtet nung aser kari Mungdang den semloka parnok lenisüba küpok shilem agia arudagi. Tebilemdangtsü kaji: Ao arogotemi home mission nung temulung tagütsüba asü, arrtsü atena or inyakba mission nung temulung tagütsüba? Ana rongnung koba mission nung arogo rongsen teimba indoker?

#### Atepdang teinyaksü mission

70s aser 80s nung ainer aika brain washed süa lir amai bilemer. Devotional nung special prayer ajakto China, Arunachal, Nepal, Bhutan, Russia, etc. atema dang sarasadem. Yimtak makamaiter ajaki arokoshia tenla agütsü. Yimtaklir tekümtet anguba kuli kodanga mangashi. Tangar lima nung temulung meyipa reportbo angashi. 70s aser 80s ainer tulur, takar lir. Parnok dang asen nisung teyarir maliba shira hau ta mali saka Burma, Arunachal nung timtemba shira sponsor asütsü mulunger. Tangar yaribaji dang mission mapa ta brain washed süa lir. - Imtjungla Longchar

ABAMI mission "Back to Village" ta sür home nung temulung terabo agüja arudagi, saka ano teinyaksü aika lir. Bendang nung indokba aser home nung indokba medemdangra seret shitak matutsü. - *Imliodang Aier*.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**



September 18, 2021 nü Zeme Supportive Mission ABAM-i Zeme nunger drop-out lanurtem atema Skill Development workshop ka ayongzüka katsüogo. Iba sentong nung lanur 40 aden. ZSM Missionary, R. Tali Imchen-i sarasadema sentong tenzük aser ZSM Coordinator, Rev. Asenba Imsong-i lanurtem sorkar dak memetaloki pei sasa koda tim rongsen bushiteta taküm tajungba lia otettsü ta asüba onük jembia liasü. Shisaluyim nung tematiba jenjang zünger pei tepok mesüa lia moutetbaji maaksü angutsü atema azünga amai ka kumogo aser asen lima nung sorkar dak nüburtemi joko tamang mekateti kumogo, anungji lanur tazung aser mazünger ajaki pei sempet bushiteta iba nungji mongin kümer taküm tajungba lia aotsü paisa ayongzüka liasü. Executive Secretary ZBA Jalukie, Rev. Sahingmak-i sarasadema sentong tembang liasü.

## MP nung ketdangsertemi Khristan lenirtem tenüng bendener

**Bhopal, September 18, 2021 (Agencies):** India kübok Madhya Pradesh nung sorkar agency balalai lisopurtem den inyaker Khristan lenirtem tenüng den parnok nija osang bendenba anema Khristantemi ola adoker, ta osang ka ajanga metetdaksü.

Madhya Pradesh nung tribal nütsüng aika aliba Jhabua district nung revenue department nungi ketdangsertemi Khristan lenirtem jaoker aser parnok dang nija osang balala asüngdangba den parnoki Khristan yimsü agizükba indang document meshir.

Revenue department-i official shidi ka ajanga Khristan lenirtem dang, kari mesüzükba agi nenoki Khristan yimsü agizük asü mesüra tashiyim amshia nenok Khristan yimsü dangi meyipdaksü, ta asüngdang.

Madhya Pradesh nung anti conversion özüng lir aser iba özüng kübok aibelenertem küm 10 tashi tepuokdak ayutsü akok.

September 13, 2021 nü sorkar department-i shidi ka ajanga Khristan lenirtem dang September 22 anüngdang 12:00 ako tashi nung parnok matsüngdangi arua parnoki inyakba mapatem dak sendakba osang tejangja agüjang, ta tuyuogo.

Jhabua distrcit nung aliba Shalom Protestant Arogo nung tongti putir, Paul Muniya-i, "Ozü pastor 16 nem-a kasa shidi agütsüogo," ta metetdaksü.

Khristan lenirtemi ashiba agi, district nung Khristantemi tribal nisungtem tenzüka arudar ajisüaka right-wing Hindu telok balalai ibaji anema nokdaker.

August 26, 2021 nüa additional superintendent of police-i shidi ka ajanga pa kübok aliba police stations nung ketdangsertem dang özüng alema Khristantemi sarasadem agiba halls shibangtsütsü aser özüng alema Khristan yimsü dangi meyipdaksüba

nokdangtsü atema Vishwa Hindu Parishad (VHP) den yaritepa inyakang, ta metetdakja liasü.

Ibaji ashishia Congress lenir aser taoba mapang Madhya Pradesh nung chief minister, Digvijay Singh-ibo, sorkar mapa inyaksü atema kechiba state police-i nija telok ka nem temeden agütsür?; iba tetuyubaji India temzüng nung lir asü, ta aitsüogo.

Taküm January ita nungi tenzüka Hindu right-wing telok balalai Khristantem anema ken o agütsür, aser state sorkari parnoki mepishibaji agizüker ama bilemer.

Taküm January ita nung VHP züngsemtemi state kübok tribal area ajak nung Tenla kitem shibangtsütsüla aser Khristan yimsü dangi meyipdaksüba nung shilem agir putirtem aser pastor tem nem temerenshi agütsütsüla, ta takhangba agüja liasü.

VHP telokisa sorkar dang, parnoki ahangba ama meinyakra parnoki tashiyim amshia Tenla ki ajak bendoktsütsü, ta amokmerena liasü.

Iba sülen March ita nung VHP lenirtemi pastor aser putir 50 tenüng sorkar nem agüja parnok anema bushisüngdangtsü takhangba agüja liasü.

Right-wing Hindu teloktemi ashiba agi, Khristan lenirtemi charity mapa inyakba nung ajemdaker tribal nisungtem mesüzüka Khristan yimsü dangi meyipdaksür.

September 17 nü osangbenertem den jembidang Muniya-i, parnoki district collector den Khristantem tebilemetsü onük lemsateptsü, ta metetdaksü.

"Right-wing Hindu teloktem amokmeren nungi onok meyong Tenla kitem kümzüksü atema onoki teyari bushitsü. Hindu teloktem amokmeren anema onoki legal teyari ajak bushitsü. Nüburtem ajak ajungtsü atema onoki yimjung aser tesünep

aginer," ta paisa metetdaksü.

September 17 nü Khristan lenir Benedict Dhamore-i, "VHP-i yimjak nung amokmerenba sülen Khristantem aika tsübur. Parnoki lisopur Khristantem nem Khristan yimsü toktsür Hindu yimsü agizükdaksüner," ta metetdaksü.

"Küm 100 tejaklen iba district nung Khristan yimsü liasü aser nüburtem tesünep nung dang lia aruogo saka tang Hindu teloktemi Khristan yimsü anema nokdaker, aser ibaji ajanga tesempa aser tetsübu dang proker," ta paisa metetdaksü.

Taküm March ita tetenzüklen Madhya Pradesh Legislative Assembly nung Madhya Pradesh Freedom of Religion Bill, 2021 agizüka liasü.

Ozüng tasenba kübok tamangba yimsü melenshinertemi anogo 60 jelia district administration nem metetdaksütsüla aser tamangba yimsü meyipdaksüba ketdangtsüa agirtemia anogo 60 jelia district administration nem metetdaksütsüla. Iba özüng kübok aibelenertem küm 3-5 tashi tepuokdak ayutsü aser senchi 50,000 tashi achitsü.

Iba dak alia kangshia tamangba yimsü meyipdaksürtem küm 1 nungi 5 tashi tepuokdak ayutsü aser senchi 25,000 tashi achitsü. Tanurtem, tetsürtem aser Scheduled Caste mesüra Scheduled Tribe nisungtem kangshia tamangba yimsü meyipdaksürtem küm 2 tashi tepuokdak ayutsü lateta liasü saka Freedom of Religion Bill, 2021 özüng tasenba kübok Arrla 3 ajanga küm 10 tashi tepuokdak ayutsü latetogo aser senchi 50,000 tashi achitsü.

International Christian Concern (ICC)-i ashiba agi, taküm January ita nung Madhya Pradesh nung anti-conversion özüng benokba sülen state nung Khristantem anema inyakba tatalokba 48 liasü.

## ANOGO ABEN TSÜNGREM DEN

### KHRISTA ASEN TEIMLA

'Idak nung jagi ni lar tsümenatsü lu la nem meyipa agütsütsü, aser Akhor lentenji teimla kikum ka asütsü asoshi, aser la aiwa anogo nung ama aser la ljiip nungi adokba anogo nung ama lai ken atentsü'.

Akhor tetezü timtemba lenden, aser kodang Hosia kaket nungji repringdangdir Akhor Lendenji teimla kikum ka meyipa agütsütsü ta shia angur. Tanü Tsüngremi asenok shia dang ya asüngdang, "Na Akhor lenden nung lira Ni ne nem teimla ka agütsütsü". Aseni dang asen mulungjang ajak agi, tanela ajak agi Pa dak amangra tanüaTsüngremi asenok nem teimla ka agütsürner.

Yisu Khrista dak amanger ajak asoshi Yisuji dang asen teimla. Taküm aser Tanela anaprongla kümzüksangji Yisu. Alima nung alidang aser sür külena Paji dang teimla, kechiaser Khritai dang teimla agütsür aser Pa dang asen teimla. Anungji asenok ajak khrista dak dang teimla kaa alitsü ayongzüker.

## ABAM WM Sintike Ministry Zone I training agi



September 13-17, 2021 anogo nung ABAM WM ajanga Sintike Ministry Zone I training Impur nung kanga takok ngua agiogo. Iba training ya Ao Lim arogo nung ayir chanutem asoshi pei sasa inyakteta litettsü nükla nung ABAM Sintike Ministry-i training balala agüja arur. Tang tashi nung ayir chanutem aika iba training nung dener mapa balala inyaka tangar dak menendaki lia arudar Tsüngrem tenüng asanger. Taküm Mrs. Alipokla Jamir, Specialized in Beauty and Hair, Mokochung, Mrs. Kilangkümla, Sub Post Manager, Impur aser Mrs. Alila Pongen, Supervisor, VTPC ABAM WM ajanga cutting and Tailoring, Cooking aser Facial sayua tangazükba jenti ngugo. Iba sentong nung arogo 8 nungi ayir chanutem parnok 16 arua training nung aden.

Tsüngremi maneni Sintike ministry ajanga tarutsü anogo nung jentipur pei sasa inyaka litettsü training agütsütsü maongka peria agüjangma ta ABAM tamang sarasadem ayur.

Sd/-

Rev. Dr. Mar Pongener  
Executive Secretary, ABAM

## NÜKMEN: DIMAPUR LIMA AOR ORDAINED MINISTERS` RONGJUI (SEPTEMBER) 25, 2021 DABA NUNG SENSAXSEM JATEPER :

Dimapur lima alir Aor Ordained ministers ajak dangi asen Kibuba aser Kümtetdakba Yisu Khrista tenüng nung salem abener.

Tanü election ajanga Ao kin Khristan tamang kanga mejungi raksatsüba ya yamai dangbo ajia meliteter. Anungji iba dak sentakba onük nung NBCC aser ABAM ajanga Clean Election maparen nung nongita yaritetsü tebilemba lemsateptsü atema Rongjui (September) 25, 2021 Honibar anepdang 10 ako nungi Ordained ministers arogo nung active service nungi anener alirtem ajak Dimapur Ao Baptist Arogo nung mensem ka alitsü ayongteper. Anungji ajak medema arutsü mepishir.

Kibubar wadang nung külemi,  
Rev. Dr. Kari Longchar  
Anogo: 18/9/2021

**OLONG PAITEP # 5941**

|    |   |    |    |    |   |   |   |    |  |    |
|----|---|----|----|----|---|---|---|----|--|----|
|    | 1 |    | 2  |    |   | 3 |   | 4  |  | 5  |
|    |   |    |    |    |   |   |   |    |  |    |
| 6  |   |    |    |    |   |   |   | 7  |  |    |
|    |   |    |    |    |   |   |   |    |  |    |
|    |   |    |    |    | 8 |   | 9 |    |  |    |
|    |   |    | 10 |    |   |   |   |    |  |    |
| 11 |   |    |    |    |   |   |   |    |  |    |
|    |   |    |    |    |   |   |   |    |  |    |
|    |   |    |    | 12 |   |   |   |    |  |    |
| 13 |   | 14 |    | 15 |   |   |   |    |  | 16 |
|    |   |    |    |    |   |   |   |    |  |    |
| 17 |   |    |    |    |   |   |   | 18 |  |    |

|                              |       |                              |       |
|------------------------------|-------|------------------------------|-------|
| <b>TIPIEN</b>                |       | <b>LANGTSÜNGLEN</b>          |       |
| 1. Inyaker ajangtetba        | - (3) | 1. Meshidak                  | - (3) |
| 3. Bangsemo adokdak          | - (5) | 2. Tanaben soshir            | - (7) |
| 6. Shitak mesüi inyak        | - (7) | 3. Iba anogo                 | - (4) |
| 7. Ya mimong nung angur      | - (3) | 4. Meshi                     | - (3) |
| 9. Reprangzük                | - (4) | 5. Yagi mi tsükloker         | - (9) |
| 10. Tasola                   | - (5) | 6. Shi tapu ka               | - (9) |
| 11. S _ _ _ _                | - (4) | 8. Yagi ayimer saka ozü masü | - (3) |
| 13. Yagi ajak ashiochtsür    | - (3) | 9. Ajokba shiruru ka         | - (7) |
| 15. Ki aokba oset            | - (7) | 12. Inyaktet                 | - (4) |
| 17. Ak shi nung inokba tasen | - (5) | 14. _ _ _ hi                 | - (3) |
| 18. Ishika                   | - (3) | 16. Akümüli nungi pilar      | - (3) |

**OLONG PAITEP # 5940 TELANGZÜBA**

|                                       |  |                                      |  |
|---------------------------------------|--|--------------------------------------|--|
| <b>TIPIEN :</b>                       |  | <b>LANGTSÜNGLEN :</b>                |  |
| 1. Telok, 4. Aluru, 6. Ozüng, 8. Emk, |  | 1. Tenükjang, 2. Luden, 3. Kiochtsü, |  |
| 9. Kin, 10. Teti, 12. Süir, 13. Jen,  |  | 5. Lenti, 7. Tajangzük, 11. teronem, |  |
| 14. Ola, 16. Talak, 17. Mazük.        |  | 12. Sempa, 13. Jahaz.                |  |

**KOMA SÜLA TELANGZÜBA**

Q. Jammu & Kashmir amato Nagaland state agi Union Territory-ang ana kümtsü nunga koma süla ?

(1) Eastern mesüra General kin-tem koba tepelaba asütsü, meshiteter. (2)Naga limai ' rule of law' ji arutsü imlar.

-WhatsApp

Nagaland STATE ngur küm 58 jungaka tanü tashi STATEbo angu saka terenlok atema aruba senbo kongi aor tejangja mangur. Political party balalai election mapang nübu ayimdangbo onok party power arura NAGALAND terenlok atema inyachtsü ta nangzükba kata jungjunga meinyaker. Anungji Union Territory ana kuma lemdanger Government of INDIAi ajaayanga NAGALAND ya develop asünung kanga ajungtsü.

-SMS

Union territory-ji angutsü, saka Manipur-len angutsü!! Tangerbo lbaji asayar, Naga nungur-i aji melazüker !!!

-WhatsApp

Nagaland-a Jammu & Kashmir amai Union territory kümtsü nungbo asenok state-i kecha mesütettsü kechisaer asenok state nungi MP ana oa mena aliba jagia asen state atema kecha meshitettsü. Taküm agi küm anabuba menaka news azüngba nung aser newspaper kecha nunga tenati Centre atema aser asen atemaa ojang ka danga shidangba mangashir. Aser asenok state nungia Minister tem aser Chief Secretary-baia Parliament nung iba nung agientettsüsa jembiteter malitsü südi. Anungji asenoksa tia maka asütsü.

-T. Ao

Nagaland aser Manipur anaprongla ya Union territory anana aküm nung kanga ajungtsü. Eastern Nagaland aser Central Nagaland. Ano Manipur UT aser Ukhrul UT ta tenüng aja nung kanga ajungtsü.

-SMS

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Küpra**  
 (n) teküp tanüla aser meilongi senzüba takümsangnu (snail)  
 \* Naga nungur kin karibo **küpra** kanga sapua achir.

**Küprak**  
 (adj) temerang (stiff, rough)  
 \* Ninang agi metak dang teküp **küprak** küpraka akümer.

**Happy Birthday**



**TENÜNG : AKUMMENLA**  
 Tasoba anogo :19th Sept. 2020  
 Küm : Ka  
 Talidak : Medemyim  
 Tsüngremi jala moatsür, küm ka junga tashi anir aru nung  
 Tsüngrem tenüng asanger. Maneni jala nem arishi  
 moajangma ta sarasademtsür.  
 - Oba, Oja, Odi & Oya.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**TANÜBO NAI LANGZÜANG**

Q. India nung nijai achaayangba railway station ka \_\_\_ State nung lapoktsü.  
 A.Tripura B.Odisha C.Kerala D.Madhya Pradesh

\_\_\_\_\_ (Taruba adok nung onoki langzüsü)

**YASHI ADOK TELANGZÜBA: Article 153**

**SUDOKU # 5982 TELANGZUBA # 5981**

|   |   |   |   |   |   |   |   |   |   |   |   |   |   |   |   |   |
|---|---|---|---|---|---|---|---|---|---|---|---|---|---|---|---|---|
|   |   | 7 |   | 1 |   |   |   | 5 | 1 | 9 | 6 | 4 | 8 | 2 | 7 | 3 |
|   |   | 6 | 9 | 8 | 7 | 2 |   | 7 | 8 | 2 | 5 | 3 | 9 | 4 | 6 | 1 |
| 2 | 3 |   |   | 7 | 4 |   | 5 | 6 | 3 | 4 | 1 | 2 | 7 | 9 | 8 | 5 |
| 6 |   |   | 5 |   |   | 4 | 2 | 8 | 9 | 5 | 7 | 1 | 4 | 6 | 3 | 2 |
| 5 |   |   |   | 4 | 6 |   | 3 | 2 | 4 | 1 | 9 | 6 | 3 | 8 | 5 | 7 |
| 1 |   | 8 |   | 2 |   |   | 6 | 3 | 7 | 6 | 2 | 8 | 5 | 1 | 9 | 4 |
|   |   | 9 |   | 6 |   | 8 |   | 9 | 5 | 8 | 4 | 7 | 1 | 3 | 2 | 6 |
|   | 1 |   |   | 8 | 9 |   |   | 1 | 2 | 7 | 3 | 9 | 6 | 5 | 4 | 8 |
|   | 6 |   |   | 2 | 5 |   |   | 4 | 6 | 3 | 8 | 5 | 2 | 7 | 1 | 9 |

**OJANG LUTEP # 5527**

EPI :

NGDA :

SÜMA :

NGATARA :

OATSTEMÜ :

TSÜANGUSA :

UNTAJG :

TETAJIA :

AKTINYSÜ :

ANGAMERNG :

**OJANG LUTEP TELANGZÜBA # 5526**

TANÜ ATEMA DANG MASÜ SAKA TETI ANISÜNGZÜKA ALITSÜ  
 MERANGA INYAKANG

**TAN HOPTA ATEMA - KOMA SÜLA ?**

Q. Nagaland nung school-tem ya akhi ama lapokdaksü nunga koma süla ?

### Amarinder Singh-i Punjab Chief Minister menden toktsüogo



September 18, 2021 nü Chandigarh nung Congress lenir aser Punjab Chief Minister, Captain Amarinder Singh-i Chief Minister menden nungi anenba sülen osangbenertem den jembiba noksa nung angur.

New Delhi, Rongjui/September 18 (Agencies): Joko tesüiba ita ishika Punjab nung Congress lenirtem mangatettep adoka aruba sülen Honibarnü Congress lenir, Captain Amarinder Singh-i Chief Minister menden nungi anenogo; Congress bangdak lenirtem tetuyuba nung pai Chief Minister menden nungi anenba shidi agütsü, ta osang angazüker.

Sangküm Punjab nung Assembly elections agitsü lia pai CM menden toktsür.

Osangbenertem den jembidang Singh-i, "Ni mezüngmeshiogo ta ni bilemer. Kü den ni pusemertemi tarutsü nung telemtetba agitsü," ta metetdaksü.

Pa den council of minister temia menden nungi anenba shidi agütsüogo, ta pa indang media advisor-i metetdaksü.

Pa indang media advisor-i twitter ajanga, "Captain-

amarinder singh-i Punjab Angh ajurua pa den council of ministers-i anenba shidi agütsüogo. Minute ishika tsüngda pai Raj Bhavan gate nung osangbenertem den jembitsü," ta metetdakja liasü.

Osangbenertem den jembidang Amarinder Singh-i, "Tang agi tasembenbuba party-i MLA tem aja. Nenoki kü dak tarendakba alitsüa akok. Ni mezüngmeshiogo, ta ni bilemer. Ni menden nungi anenogo," ta metetdaksü.

Tarutsü nung koma asütsü?, ta asüngdangba langzüdang pai, "Yimtenren nung teti teshimtsü lenmang lir, aser tarutsü nung ni kü lenmang shimtsü. Ni Congress party nung lir. Ni pusemertem den ni jembitsü aser yimtenren atema telemtetba agitsü," ta metetdaksü.

Singh-i ashiba agi, CM menden nungi anentsü atema pai tanep (September 18) telemtetba agia liasü aser

Congress Tir, Sonia Gandhi nem-a iba osangji metetdakja liasü.

Singh-i state Angh, Banwarilal Purohit nem CM menden nungi anenba shidi agütsüdang pa den pa kinüngtsü MP, Preneet Kaur aser par jabaso, Raninder Singh nata liasü.

Punjab Chief Minister menden atema taoba mapang Punjab Congress Tir Sunil Jakhar, Cabinet Minister, Sukhjinder Randhawa mesüra MP, Partap Bajwa nunger rongnung ka shimtsüa akok.

Tamalen osang ka ajanga ashiba agi, party bangdak lenirtemi Capt Amrinder Singh dang CM menden nungi anenang ta tuyua liasü.

Singh CM menden nungi anenba sülen AICC-i Honibar nikongdang 5:00 ako nungi Punjab CLP (Congress legislative party) senden ayongzüka menogo.

### September 26 nü IAF-i Srinagar nung air show agitsü

Srinagar, September 18 (Agencies): September 26 nü IAF indang skydiving team Akash Ganga aser Suryakiran Aerobatic & Display Team-i Srinagar nung aliba Dal awatsüng nung air show sayatsü, ta ketdangsertemi metetdaksü.

Tang tagidak 'Azadi ka Amrit Mahotsav' dak sendakba nung air show ji Air Force Station Srinagar aser Jammu & Kashmir administration nati

ayongzüka agitsü. 'Give Wings to Your Dream' omen nung iba exercise agitsü aser iba ya Kashmiri lanurtem Indian Air Force (IAF) nung adentsü atema jangradaktsütsü aser region nung tourism ajungkettsütsü nükjidong nung ayongzüker, ta ketdangsertemi metetdaksü.

Dal Lake nung aliba Sher-e-Kashmir International Conference Centre (SKICC) nung Lieutenant governor, Manoj

Sinha-i air show tenzüktsütsü. Iba sentong nungji college aser school tanur 3,000 den tesayur 700 shi adentsü imlar.

Kasa sentong nung kaketshirtem dang IAF-i amshiba technology tasen aika sayutsü.

SKICC nung stall balala lapoktsü aser kaketshirtemi IAF nung temzüngtem aser temsüa aliba indang metetba den külemi IAF nung adentsü atema maongka angutsü.



September 18, 2021 nü New Delhi nung Defence Minister, Rajnath Singh-i linük 115 nungi bener aruba tzü meshitetba noksa nung angur. Ayodhya nung Ram tekülem ki yangluba meshitettsü atema linük 115 nungi bener aruba tzüji amshitsü.

### PM Modi asoba anogomong nung vaccine dose crore 2.50 agütsü

New Delhi, September 18 (Agencies): September 17, 2021 anogo ya Ato kilonser, Narendra Modi asoba anogomong lir, aser iba anogomong nungtem nung India nung coronavirus vaccine dose crore 2.50 dak tema agütsüogo.

Taküm January nung India nung coronavirus vaccine agütsü tenzükba sülen anogo ka kija nung vaccine dose timtiba agütsüba anogoji Hokolbarnü liasü.

Union Health Minister, Mansukh Mandaviya-i, iba record ya alima puti otsü nung khenyongi balaka lir, ta metetdaksü.

NITI Aayog CEO, Amitabh Kant-i, anogo ka kija nung coronavirus vaccine dose timtiba agütsüba otsü India-i yanglutetogo, ta metetdaksü.

Ano Congress-ibo ibaji aija, Modi asoba anogo nung ang BJP-i yimsüsüba state temi vaccination atema meranga inyakogo, anungji anogo shia Modi asoba anogomong amongtsüla, ta ashi.

Osang angazükba agi, June ita nung China-i anogo ka kija nung coronavirus vaccine crore 2.47 agüja liasü saka tangbo anogo ka kija nung dose timtiba agütsüba linükji India kümogo.

Ato kilonser, Narendra Modi-ia twitter ajanga, "Vaccine timtiba agütsüba record ajanga India nunger ajak nüma tanga

alitsü. Vaccination takok angutsü atema kanga meranga inyaker asen doctor tem, administrators, nurse tem, healthcare workers aser front-line workers ajak nem ni tenüngsang agütsür. Covid anema takok angutsü atema asenoki vaccination mapa maneni inyakdi," ta metetdaksü.

Hokolbarnü coronavirus vaccine dose timtiba agütsüba state ji Karnataka (dose lakh 26.9) liasü, iba sülen Bihar (lakh 26.6), Uttar Pradesh (lakh 24.8), Madhya Pradesh (lakh 23.7) aser Gujarat (lakh 20.4) state tem lir.


Congress lenir, Rahul Gandhi-i linük nung vaccine ji yamaji kera agütsütsüla, ta ashi.

Congress lenir, P Chidambaram-i, "Hokolbarnü vaccine dose crore 2.5 agütsüba atema ni pelar, saka iba atemaji kechiba Ato kilonser asoba anogo ang ata?" ta asüngdang.

"Ato kilonser asoba anogoji December 31 nü asü nungbo taküm tatemangbuba anogo nung ang vaccine dose crore 2.5 ji agütsütsü tebilemba liasü asü," ta paisa asüngdang.

Chidambaram-i, "Vaccination ya tasoba anogomong nung cake arangba ama masü. Vaccination ya programme ka lir, inyakyim ka, anungji tasoba anogomong ka nung masü saka anogo shia timba-timba agütsütsüla," ta ashi.

### R N Ravi-i Tamil Nadu Angh inyaktsü atema tenangzükba agi



September 18, 2021 nü Chennai nung Raj Bhavan kima Madras high court Chief Justice, Sandeep Banerjee-i ketdangsüa R N Ravi nem Tamil Nadu Angh tenangzükba agidaktsüba noksa nung angur.

Chennai, September 18 (Agencies): Honibarnü R N Ravi-i Tamil Nadu nung Angh inyaktsü atema tenangzükba agiogo; pa state nung Angh 26buba asütsü.

R N Ravi-i Banwarilal Purohit melener. Purohit ya tangbo Punjab nung Angh aser Union territory of Chandigarh nung Administrator teinyakdak.

Honibarnü Guindy nung aliba Raj Bhavan moapu nung Madras High Court nung Chief Justice, Sandeep Banerjee-i ketdangsüa Ravi nem Angh tenangzükba agidakja liasü.

State Chief secretary, V Irai Anbu-i September 9 nü linük Tir, Ram Nath Kovind-i state Angh atema Ravi shimba zünga metetdaksü.

Tenangzükba agiba sentong nungji Chief Minister M K

Stalin, opposition lenir, Edappadi K Palaniswami, minister tem, judge tem, MP tem, MLA tem aser tongti ketdangsertem aika dena liasü, ta ketdangsertemi metetdaksü.

Kasa sentong nung alakteta jaokertemji taoba mapang Telangana Angh, E S L Narasimhan, taoba mapang chief justice of India aser taoba mapang Kerala Angh, P Sathasivam, taoba mapang national security advisor aser taoba mapang West Bengal Angh, M K Narayanan aser RSS lenir, S Gurumurthy nunger liasü.

Congress-ibo iba sentong nung madentsü lemteta liasü.

Tenangzükba agiba sentong tembangba sülen chief minister, K Stalin-i Angh nem Speaker M Appavu aser council of ministers ajak metetpelaja liasü.



Kabul nung bomb apokba tesem nung Taliban sepaitem aser iba tesem temeket nung alirtem adenshia aliba noksa nung angur. Kabul nung sticky bomb ka apokba sülen nisung ishika yirua liasü, ta police ketdangsürtemi ashi.

## France-i US aser Australia nungi Envoy tem anin

**Paris, Rongjui/September 18 (Agencies):** Fracne tir Emmanuel-i Hokolbarnü United States aser Australia nungi ambassador tem aninba sülen yimden yimsüsüba nung France mepetmesü nung lir ta foreign minister Jean-Yves Le Drian-i ashi. Trilateral security deal ka yangluba ajanga France-i design asüba submarine contract ka dak sendakba nung USD billion 40 takoksa ajuruba sülen iba telemtetba agia liasü.

Foreign minister Jean-Yves Le Drian-i ashiba agi, ken o kanga tongtiba asüba ajanga tir Emmanuel Macron-i iba telemtetba agi.

Brehostibarnü Australia-i ashiba agi, France Naval Group den conventional submarine fleet ka yanglutsü asoshi nangzükteper aliba agintsü aser iba melena trilateral security partnership ka yangluba sülen U.S. aser British technology amshia nuclear-powered submarines ti yanglutsü. France-i iba jenjang agiba ya tashioktsüba ka ta shiogo.

White House ketdangsür kati ashiba agi, France-i iba telemtetba agiba ya United States-i kanga sasar aser iba ken o dak sendakba nung Washington-i France den tongtepratepa arudar. Ketdangsürisa France den mangatettep aliba bentettsü atema United States-i tarutsü nunga maneni inyaksü, ta ashi.

France nung diplomatic source kati ashiba agi, tang mezüngbuba Paris-i parnok indang ambassador linüki meyipa jaokogo. Ajisüaka

foreign ministry sangdong ajanga Britain indang kecha mesangdong, saka iba diplomatic source-i ashiba agi, Britain ya maongka agitsü atema iba tenangzüktepbba nung aden ta France-i bilemer.

U.S. Secretary of State Antony Blinken-i Brehostibarnü France süngjmdaktsütsü merangogo aser ashiba agi, Indo-Pacific nung France ya tongtibang partner ka lir.

Hokolbarnü Australia Ato Kilonser Scott Morrison-i, France-i parnok nem iba tenangzüktepbba indang osang jelia magütsü ta shia aitsüba magizük, aser ashiba agi, pai France tir den sensaksemba mapang French company ka den submarine yanglutsü atema 2016 küm tenangzüktepbba yanglur aliba ya agintsü akok ta shiogo.

Iba tenangzüktepbba raksaba ajanga Australia aser France ta tesendaktep mejungi akümba Morrison-i agizükogo, saka pai June ita Macron dang Australia-i parnok tebilemba melenshitsu akok ta shiadokogo, ta ashi.

"Paris nung sensaksemba mapang tensa den peta inyaksangshitsu atema conventional submarines capabilities kangabo taapet masütsü ta bilemba indang pa dang jangja jangja shiogo," ta pai 5aa Radio dang ashi.

"Iba ken o ya Australia-i linük tejangraba dak ajemdaker telemtetba agitsü nüngdakba ken o ka lir," ta paisa ashi.

Australia indang Foreign Minister Marise Payne, Washington nung American

Enterprise Institute think tank den jembishinüa aliba mapang ka nung France-i iba telemtetba agiba sangdong. Lai iba ken o jangjaa aliba temaitsü kecha mesayu.

Submarine deal indang jembidang Payne-i, commercial aser strategic telemtetbatem achaayangtsü tasak saka tasüngdangba ka langzüba mapang lai, France ya kanga metsünga reta züngshiba tembar ka lir ta ashi.

"Parnok tezü adangba ni angateter," ta lai ashi.

China kanga tashi ita akümba ajanga Asia aser Pacific nung teyari talila nüngdaka United States-i teyari bushiba mapang talangka nungi tesendaktep tajung nung aruba linük ana tsüngda mangatettep adokogo.

France-i European Union tir menden atsüngtsü lir, shirnoki Brehostibarnü Indo-Pacific atema tasa asaba ka sangdongogo, kong Taiwan den shishilembaba tsütsü tenangzüktepbba ka yanglutsü aser tzü lenmang sadema lapoka ayutsü atema rong talila yoktsü tenangzükba dena lir.

Washington's Center for Strategic and International Studies nung züngsem Pierre Morcos-i, France-i iba jenjang agiba ya otsü sütsüka ta shiogo.

"Yashi Secretary Blinken-i jembiba otem ya Paris asoshi teperi masü... talisa France ketdangsürtemi iba tenangzüktepbba yanglutsü atema ita agi jembishinüa aruba indang angazükogo," ta pai ashi.



Las Vegas anasa Mount Charleston Lodge nung mi adokba sülen mibenertemi inyaksangshiba noksa nung angur. Hokolbarnü mi agi Mount Charleston Lodge indang ki tongtiba rongga liasü.

## Taliban-i teburtem atem school lapoktsüogo

**Kabul, Rongjui/September 18 (Agencies):** Taliban-i class trok nungi 12 tashi nung azüngertem aser tebur tesayurtem atema Honibarnü nungi school lapoktsü temelaba agütsüogo. Ajisüaka tetsürtem kodang nungi school-i osettsü, iba indang osang kecha magütsü aser iba ajanga hardline Sunni Pashtun telok yagi tetsürtem nem tenokdangba agütsütsü akok ta tebilemtsü akar.

Taliban ministry of education-i iba osang ya Hokolbarnü sangdong aser ashiba agi, primary aser secondary jenjang nung state aser nija school tem aser official madrasa religious school tem Honibarnü nungi lapoktsü. "Tebur tesayur aser kaketshirtem school-i osettsü," ta Taliban sangdong ka ajanga metetdaksü.

Taliban-i linük yimtiba Kabul atsüngba sülen Afghanistan nung educational institution timba ita ka dak tema shibanger liasü. School kar nungbo tetsür tanurtem Class 6 tashi class nung dena liasü aser tetsürtem university class tem nunga dena arudar. Ajisüaka Afghanistan nung tetsürtem atema high school tem shibanga lir.

Taliban ketdangsürtemi tetsür aser teburtem class

takdang balala nung mener angazüktepra tetsürtem school-i osettsü aser parnoki taoba Taliban sorkar ama inyaksangshi masütsü ta tenangzükba agütsüogo. Taoba Taliban sorkari tetsürtem kaket shisatsü angazüktsü tenokdangba agüja liasü. Ajisüaka province kar nungbo health department, mozüki aser education department nung inyakerkem dak alaka tetsürtem parnok mapai aotsü memelar.

UN Children's Fund (Unicef)-i Afghanistan nung Honibarnü nungi school tem lapokba pelashishia agizükogo, saka ashiba agi, tetsürtem class nung adentsü atema tenokdangba magütsütsüla. "Tetsürtem aika school-i aotsü atema temelaba magütsütsü akok ta onok shisabulua bilemer. Tang mepetmesü madok tsüngda tanur million 4.2 school tem nung züngoksema maliasü," ta Unicef tekolakba Henrietta Fore-i ashi.

"Tetsürtem sentoka metoktsütsüla. Memenoi tetsür tanur aser taintem kaketshisatsü angazüktsü temelaba agütsütsüla. Aser iba atema tetsür tesayurtemi tesayuba agütsü tenzüktsü nüngdaker," ta Fore-i ashi.



US real estate scion Robert Durst-i pa kinungtsü samaba indang police nem osang magütsüdaktsütsü atema pa indang chichiba tembar tepsetba atema Hokolbarnü aitsüogo. Durst ya multi-millionaire ka lir aser pai 2000 küm Susan Berman dak lar kidang tesülen nungi khaloktsü ta aitsüba magizüki aruogo.

## Bali Semdangtsü atema October ita nungi melatsü

**Jakarta, Rongjui/September 18 (Agencies):** Indonesia sorkari resort asetkong; Bali October ita nungi bendangertem nem semdangdaktsütsü telemtetba agiogo, ta Minister kati ashi. Linük nung Covid-19 tashidak menatepa aoba kanga tajemba akümba sülen iba telemtetba agiogo.

Hokolbarnü Maritime and Investment Affairs, Coordinating Minister Luhut Binsar Panjaitan-i sangdong ka ajanga, Delta variant agi animesor linük nung July nungi August tashi corona wara tanabuba wave agi kanga mejungi kongshir aliba süngjemogo aser tangbo positivity rate shilem 5 dak tajemba kümogo, ta ashiba Xinhua news agency sangdong ka ajanga metetdaksü.

Covid-19 Task Force-i, July 15 nü nisung timtiba (56,757)

dak tashidak potetba mangaoka lir, ajisüaka September 17 nü tashi nnungbo anogo shia tashidak potetba 3,835 tashi alu.

"Tashidak menartem iba amai dang tajemba küma ora Bali lapoktsütsü atema onoki temulunglema bilemer," ta Panjaitan-i ashi.

Indonesia-i Covid-19 kanga junga aziokteteter aliba linüktemi nungi nüburtem nem linük semdangtsü atema tama maongka agütsütsü.

Ketdangsürtemi hopta shia wara aziokba jenjang asadanga alitsü, ajita asünungdang tensa azüoka yutettsü aser Bali tanabuba wave agi kanga tetsükdaktsü malitsü.

Covid-19 tashidak menar tajemba küma aoba ajanga Bali nung tenokdangba agütsür aliba agintsütsü atema sorkari Hombarnü telemtetba agiba sülen Hokolbarnü iba osang sangdongogo.



Dimapur, Rongjui/September 18, 2021: Honibarnü, DC conference Hall, Dimapur nung Nodal Officer (Disaster Management), Dimapur menden ser agiba sentong ka nung, DC & Chairman, DDMA, Dimapur-i frontline worker pungo, shirnok Covid-19 agi asü, parnok kibong shia nem teyari sen lakh 10 (10 lakhs each) agütsüogo.

## Covid-19 State Level Monitoring Team-i Mon semdang

**Mon, Rongjui/September 18, 2021 (TYO):** Hokolbarnü (17.09.2021) Mon Deputy Commissioner, Office indang Conference Room nung, District Task Force (DTF) for Covid-19 Mon-i State Level Monitoring Team nungi teshimtet nübu, Mon indang lokti tentet balala, Higher & Technical Education, Commissioner & Secretary, W. Honje Konyak aser Dy. Director, NSACS, Dr. Nukshisangla Jamir den telongjem senden ka ayonga agiogo, ta sangdong ajanga metetdaksü.

Iba senden nung, Honje Konyak-i, Covid-19 tensa junga asadangshitsü, DTF aser health worker tem nem tim tetuyuba agütsütsü aser iba wara azioktsü asoshi inyaker health worker temi tayongzükba balala ajurubatem angadanga aser olemteptsü nükjidong nung, State Level team den iba senden agir, ta telok dang metetdaksü.

Team-i Tobu aser Aboi semdangogo, kong parnoki külem sendaktepa alir ajak den shisadokten senden ayonga agiogo aser iba wara azioktsü

asoshi tesem ana nung meratem agia mapa küma inyakba angudang team puri telangzüba tajung agütsü, ta Honje-i metetdaksü.

Iba wara azioktsü aser nüburtem iba tesashi wara nungi kümzüka ayutsü asoshi lenla ajunga nung maparen takok ngua achaayangba atema, pai DC Mon, Thavaseelan K, IAS lenisüba kübok DTF Mon dang pelaba lemsatep.

Ajisüaka, iba wara samaogo ta ayong ayonga malitsü aser Covid-19 wave tasembuba adoktsü asüa, iba wara anema raratsü asoshi renemshia alitsüla, ta züngsem ajak dang pai tekümdangtsü agütsü.

Alima ajunga asüngba COVID-19 wara nungi nüburtem kümzüka ayutsü nükjidong nung lokti tentet balalai meranga inyakba atema Dy. Director, NSACS, Dr. Nukshisangla Jamir-i item tentet shia dang pelaba lemsatepa liasü.

State kübok Covid-19 wara aziokba maparen nung Mon district ajanga tajungtiba achaayangogo, ta lai metetdaksü; aser District

atema mapang mashi ka nung Team-i yaritsü renema dang lir ta Task Force dang lai nangzük; aser nüburtem kümzüka yutsütsü asoshi maneni mapa tajung inyaksü lai züngsemtem ajungshiogo.

Iba senden nung, medical team züngsemtemi power point presentation ajanga metetdaksüba asalentongtem (Covid-19 dak sendakba) aser Covid-19 tendangba aser Covid-19 vaccine agütsüba maparen tem Monitoring Team-i junga asadangshiogo.

Health workers temi tayongzükba balala ajuruba aser maparen tajungba melenshia inyaksü asoshi senden nung telok olemtepa liasü. Iba dak sendakba nung, DTF ajanga timtem balala ajuruba tebilemtsü ajak State Level dangi abentsü, iba den nungdakba teyari agütsütsü asoshi Monitoring Team-i bangjemtep.

Iba senden nung, DTF Mon indang züngsemtem, Department balala den KU, KNSK aser KSU tentet nungi teshimtet nübutem aruagi denogo, ta kasa sangdong nung shia lir.

## Pfutsero nung school uniform lema agütsü



**Pfutsero, Rongjui/September 18, 2021 (TYO):** Academic session 2021 atema Principal Director, School Education ajanga 'Free School Uniform' sangdongba nung anidaka, Hokolbarnü (17.09.2021) EBRC Pfutsero-i, Class I nungi Class VIII tashi azünger kaketshirtem atema, SMA nungi aruba angati school uniform, poster aser register tem lema agütsüogo, ta sangdong ajanga metetdaksü.

EAC, Pfutsero aser SDEO Plutsero kübok Free School Uniform Committee nung züngsem, Dr. Riku Khutso aser SIS. SDEO Pfutsero, Senupelo Lasuh na matsüngdang, kaketshirtem atema item school uniform lema agüja liasü.

Iba sentong nung, EAC, Dr. Riku-i, Govt. School nung azünger kaketshirtem tim nung anitettsü aser tenüng tajung bener arutsüsa parnok kaketshir tajung ka ka

kümdaktsütsü asoshi tesayurtem ajungshiogo.

Sorkar nungi anguba osettsüset aser Uniform ajak ya kaketshirtem shisaliok bushiba wadang tsütsü nendak nendaka aser temolung agüja bushitsü asoshi ajungmesotsü nükjidong nung lir, ta pai tuteta ashi. Sorkar ajanga teyuba SOPs talisa tejak nembangba mask inokba aser social distancing nung anidaka iba sentong agiogo, ta kasa sangdong ajanga metetdaksü.

## KANGA DANG PELAR

"Pai kü nüla süngzükdaksür, Pai ni temeshi lenmang nung Pa nüng atema anir." T.Ken 23:3



Aso: 09.05.1938

Asü: 11.09.2021

Onoki teti meima aliba obala asür **S.Manen Jamir** (Akhoya) shiranga aliba mapang nungi tasü nü tashi shirnokisa sarasadem, nübo aser rongsen tenla tulu agi ozü den yaritepogo, nenok ajak dang kanga pelaba iba sabang ajanga lemsateper.

Nenok mapa tajung asoshi ozüi kecha meyipa agütsütsü makoker, saka asen Tulusang Tsüngremi nenok kija aser kibong tali moajangma, ya ozü sarasadem.

~ Temeim Kinungtsü, Chirnurtem, Semchirtem aser Kinunger- Anükapang.

## MENUNGRA BILEMTETER

Late Katemchila (19.09.2020)

"Kechiaser ni asoshi taküm alibaji khrista, aser tasütsüji tajangzük lir". Fil-1:12

Temeim ojala nai iba akhümlü doktsür orr tanü 19.09.2021 küm ka ajungba anogo nung nü temeim ajemalu, taremsük aser menürem yimyattem menungra bilemteta kinüngertertem ajaki sarasadema amonger.

~ Temeim chirnurtem, semchrtem aser kinüngertertem



## Phek nung Awareness campaign ka agi

**Phek, Rongjui/September 18, 2021 (TYO):** Hokolbarnü (17.09.2021) Government Higher secondary School, Phek kübok HIV, TB & Blood donation nung awareness campaign agia liasü, ta sangdong ajanga metetdaksü.

Iba sentong nung, John Kizo PGT GHSS, Phek menden liasü aser Kuduvo Kezo DAPCU-i telok pela agizük.

DPO & DACO, Dr. Rukuvolie Rutsa-i, TB nungi jenbua alitsü indang nung jembia liasü, kong TB ya nisung o nisung tsüngda menatepa tashidak ka, anungji iba tashidak nungi kümzüka alitsü atema asenoki tekümdangtsü meratem

agitsü nungdaker, ta pai ashi.

Alima tesem balala nung nisung million aika iba tashidak agi südar aser asenoka iba tashidak agi memeneptsü asoshi tali dang kümdangshia aser mera tapet agitsüla, ta pai sentong nung adenertertem ayongzük.

Rutsa-isa HIV/AIDS indang lemsatep aser iba tashidak memenatsü asoshi taküm kaji asüngtetta alitsüla nungdaker, ta paisa ashi.

Kasa sentong nung, DPO, DAPCU, Ketshelese Kire ajanga aziü tenlaba (blood donation) indang tongtibangtem telok den lemsatepa liasü, ta sangdong nung shia lir.

## Dimapur nung mejangjaba tasü mang ka ngutet

**Dimapur, Rongjui/September 18 (TYO):** Septemeber 18 nü Traffic Zone-I Office opposite nung aliba Fly-over kübok mejangjaba tasü mang (Non-local tebur / küm 35-40 tsüngda) ka ngutetogo.

Ken o bushistüngdangba sülen nisungba ya aya agi asü asütsü akok ta bilemer. Temzüng ozüng kübok maparen ajak tembanga inyakba sülen tasü mang ya post-mortem examination atema

Dimapur Civil Hospital-i benerogo.

Iba dak sendakba nung asüsanger kinunger aser medemertertem dang East Police Station Dimapur Officer-in-Charge (Mobile No. 7085055020) den tongteprateptsü mepeshia metetdaksüogo, ta Dy. Commissioner of Police (Crime) & PRO, Dimapur sangdong ka ajanga metetdaksü.



Noklak, Rongjui/September 18, 2021: Honibarnü, DC Conference Hall, Noklak nung Deputy Commissioner, Hiazu Meru-i anir Noklak District Task Force on COVID-19 senden agiba mapang tangokba noksa ka yangi angur. Iba senden nung, teloki COVID-19 care center, Covid-19 check Gate, Taxi service, COVID-19 hospital inyakyimtem asadangshitsü aser sorkar ajanga teyuba ama district nung Shisaliok rejutem lapoktsü asoshi olemtepa liasü.

## Durand Cup: Delhi FC aser Bengaluru FC na draw nung tembang



Kolkata, Rongjui/September 18, 2021: Durand Cup asayamung nung Delhi FC (jersey tanak) aser Bengaluru FC na asayaba mapang tangokba noksa ka yangi angur.

**Kolkata, Rongjui September 18, 2021**

**(Agencies):** Honibarnü, Mohun Bagan ground nung 130buba Durand Cup - Group C nungi Bengaluru FC aser Delhi FC na asaya draw (goal 2-2) nung tembangogo. Iba asaya mapang, Delhi FC atema Willis Deon Plaza-i (58th, 62nd) goal ana aser Bengaluru FC atema Siva Sakthi N (27th) aser Bidyashagar Singh (75th) nati goal ka ka idaktsü.

Tang, Durand Cup - Group C nung team pezüprongla taruba round nung asayatsü asoshi maongka tajung angutsü.

Iba asaya mezüing half nung, team anaprongla kanga süngjema asaya liasü, kong team anapronglai goal

idaktsütsü maongka angu, saka item maongka magitet.

Ajisüaka, Bengaluru FC pur goal ka agi tejakdang ser asaya asoshi, minute 27buba nung Siva Shakti-i goal idaktsü.

Delhi FC-ia goal idaktsü temolungtetba nung kara asayatsü tenzük. Mezüing half nung, Delhi nungi Willis aser Himanshu Jangra nati goal ka ka idaktsütsü merangdang, saka Bengaluru keeper Lara-i goal anaprongla nokdang.

Break sülen, tanabuba half nung, team anaprongla yimya melenshia asayatsü tenzük, kong Delhi FC puri asaya shilem timbaka amokbangadok aser minute 58buba nung Trinidad & Tobago national team nungi asayar Willis kolak agi goal ka idaktsü aser minute

pezü sülen pai ano Delhi FC atema goal tanabuba bendenloktsü.

Delhi FC puri iba asaya akoktsü teimla liasü, saka Bengaluru indang Bidyashagar-i telok atema goal tanabuba idakja liasü. Külem asayar Harmanpreet Singh ajanga metsüketa yokba cross ball ka agizüka Bidyashagar-i Bengaluru FC atema goal tanabuba idaktsü.

Asaya atemtsü mapang tatsüka dang anünga lia, team anapronglai goal idaktsütsü meranga toktep, saka iba asaya draw nung tembanga telok anapronglai point ka ka angu.

Iba asaya temer sülen, Delhi FC indang Willis Deon Plaza nem 'man of the match' award agütsü.

## Mizoram U-19 head coach Murtaza Lodhgar süogo

**Rongjui/September 18, 2021 (Agencies):** Hokolbar aonung Visakhapatnam nung Mizoram indang Under-19 coach, Murtaza Lodhgar temolung agi mapa meinyaki akümba sülen iba akümlü nungi pilaogo, ta sangdong ajanga Cricket Association Bengal (CAB) president Avishek Dalmiya-i metetdaksü.

Arishi küm 45 tain Lodhgar ya Vishakapatnam nung Mizoram U19 cricket team den liasü. BCCI indang domestic season tenzüksü renemdar asünung, Mizoram U19 cricket team-i Vinoo Mankad Trophy (U-19 National One Dayers) indang league phase nung asayatsü renema liasü.

"Chiyongba (dinner) sülen, iba lendong ataloka," ta osangbener dang Dalmiya-i ashi.

"Chiyongba sülen, Murtu bhai (Bengal nung Murtaza nem jatetsüba nüngja) den team indang physio yimdongi kazüi ao aser aoksa dang pa

teko nung tashitsü atu aser lenmang nung laowadok. Idangjisa physio aser tanga team züngsemtemi aritepa pa mozüki kati anir ao, kong pa süadoker ang mozüki tonga aru ta doctor temi osang metetdaksü," ta Dalmiya-i ashi.

"Murtu bhai asüba ya mamangteter. Pa asüba ya ni atema takoksa tulu ka ama bilemer, kechiyong pa ya Rajasthan SC mezüing division club indang tongtibang nübu ka liasü. Onok telungtet nung ajaki sapuba cricket asayar rongnung Murtu liasü aser tetsür indang team nunga pai bendanga agütsür inyakogo. Iba tawa kecha agia süngdaksütsü makok," ta Dalmiya-i ashi.

Murtaza'er adianu aser kinunger temi pa mang talidaki bener arua aser aremstü asoshi, Cricket Association of Bengal-i maparen achaayangdar. Honibarnü, Murtaza'er adianutem tayimtsü ajanga Vizag-i ogo.

Club cricket tsütsü Murtaza

Lodhgar-i junga asaya liasü, saka domestic cricket asayar tetsüti Utpal Chatterjee aliba yong, pai Ranji Trophy match 9 nung dang shilem agi aser iba mapang pai wicket 34 agia liasü.

Murtaza-i first-class career nung shilem tajungtiba agiba rongnung, 2004-05 season nung asütsü. JU (Salt Lake) ground nung Karnataka den asaya mapang pai wicket 5 tashi agia liasü.

Kasa season nung, pai ano match kar asaya, saka pai maongka tajung mengutet.

"Kü tembar tajung anojungi kanga kara ogo," taoba mapang Bengal captain Deep Dasgupta-i ashi.

United Kingdom nung Club Cricket tsütsü pai mapang shia shilem agia liasü.

Murtaza iba akümlü nung meliaka, par medemer aser temolunger temi pa ajemaluba aser tila akümba den ajak den pelatepa jungtephitepa aliba kodanga mamatetsü.

## NBC:Hussamuddin Sachin na quarterfinal-i iogo

**New Delhi, Rongjui/September 18, 2021 (Agencies):** Honibarnü, Bellary kübok Inspire Institute of Sports nung ayongba '5th Elite Men's National Boxing Championships' nung, 2018 Commonwealth Games nung bronze medal angur Mohammad Hussamuddin (57kg)-i maneni shilem tajung agia takok anguba sülen, pa quarter final-i iogo.

Defending Champion Hussamuddin, shibai Services Sports Control Board (SSCB) tenüing nungi iba asayamung nung shilem agidar, pai Chhattisgarh nung Sahil den pre-quarter final asaya liasü. Hussamuddin-i kanga dang meranga Sahil den toktepa asaya aser pai 5-0 agi Sahil tsükdaktsü.

Deobarnü, Hussamuddin-i Maharashtra nungi Rushikesh Goud den asayatsü.

Kasa asayamung, 57kg category - round of 16 match tanga ka nung, Haryana nung Sachin aser Manipur nungi Jobison Yengkokpam na asaya liasü. 2021 World Youth Champion, Sachin, shibai

Hokolbarnü World Championship medal angur Gaurav Bidhuri tsükdaktsü, Honibarnü iba asaya nung pai Jobison madak 5-0 agi takok ngua quarter final tongogo.

Goa nungi Roshan Zamir (54kg)-i Rajasthan nung Suraj Bhan Singh madak 3-2 agi takok ngua quarter final-i iogo. Rajasthan nung Bhim Pratap Singh (51kg) aser Delhi nungi Rohit Mor (57kg) naprongla pei pei tata asaya point kasa (5-0) agi takok anguba sülen, quarter-final tongogo. 60kg category nung, Tripura nungi Parvinder Poonia-i 5-0 agi Tamil Nadu nung Prabhu Murali tsükdaktsüba sülen, quarter final-i iogo.

Iba asayamung September 21, 2021 nü tembangtsü aser category balala nung gold medal angur ajak '2021 AIBA Elite Men's World Boxing Championships' nung shilem agitsü maongka angutsü. World Boxing Championship ya Belgrade, Serbia nung October 24 nungi tenzüka November 6, 2021 tashi asayatsü sentong lir.

## Khel Ratna atema Pramod Bhagat tenüing agütsüogo



Pramod Bhagat

**New Delhi, Rongjui/September 18, 2021 (Agencies):** Paralympic Committee of India (PCI)-i Major Dhyhan Chand Khel Ratna Award 2021 atema shooter Manish Narwal, high jumper Sharad Kumar, shuttler Pramod Bhagat aser javelin-thrower Sundar Singh Gurjar tenüingtem agütsüogo.

Tawa tembangba Tokyo Paralympics nung asayar pezüpronglai India atema tenüing tajung bener arutsü.

PCI indang President, Deepa Malik-i, 2024 Paris Games nung ano tajungba asayatsü asoshi iba award agizükba ajanga athlete tem tali ajungmesotsü, ta ashi.

"Paralympics (Tokyo Paralympics) nung athlete temi kanga dang junga asayaogo aser parnoki tenüing tajung bener arutsüba asoshi asenok ajak nüma-atanger. Item award ajanga, taruba Games nung ano tajungtiba asayatsü asoshi

athlete tem ajungmesotsü aser parnok nem iba award agütsütsü kanga dang tetemtsü, kechiyong linük asoshi parnoki tenüing tajung bener arutsüogo," ta Deepa Malik-i ashi.

Deepa-i, Arjuna Award atema javelin-thrower Sumit Antil aser shooter Avani Lekhara naprongla tenüing agütsüogo, ta metetdaksü.

"Arjuna Award atema, Sumit Antil aser Avani Lekhara naprongla tenüing agütsüogo; athlete anapronglai medal anguba ajanga linük nem tenüing tajung bener arutsüogo," ta lai ashi.

Taoba ita, Union Minister of Youth Affairs and Sports, Anurag Thakur-i, taküm indang National Sports Awards nung Tokyo Paralympics nung medal angur athlete nem award agütsütsü, ta osang sangoktsü.

Medal angur Para-athlete nem award agütsütsü lemetetba yong, National Sports Awards sentong atsülangja liasü.

## BILEMDANGANG

"Temoatsü mesüra timtemji ayimdena marur."